

Spot da la SSR è concorrenza illoiala

■ (rtr) Il tribunal federal ha confermà ina sentenza cunter la SRG SSR en connex cun in spot da reclama. En il spot aveva la SSR cumpareglià las tariffas da radio e da televisiun cun custs d'abunament per gasettas. Sin quai aveva il concern da medias Tamedia rinfatschà a la SSR concorrenza illoiala.

La dretgira commerciala da Turitg aveva dà raschun a la Tamedia, la SSR n'ha dentant betg acceptà questa sentenza e tratg vinavant ella. Il messadi principal dal spot da reclama dispitaivel è ch'ils custs per guardar mintga di televisiun sajan pli bass che quels per leger la gasetta mintga di. Latiers vegnan num-

nads tranter auters ils pretschs per in abbonament annual dal «Tages-Anzeiger» e da la «SonntagsZeitung».

Tenor il Tribunal federal haja la SSR cumpareglià chaussas ch'ins na possa betg vairamain cumparegliar. Cumparegliaziuns da pretschs èn tenor lescha be permess tar medema quantidad e qualitad.

La SSR sto pajar ils custs da dretgira da 5000 francs e plinavant 6000 francs indemnisaziun a Tamedia. La SSR prenda enconuschientscha da la sentenza, sco ch'ella scriva en ina posiziun. La Tamedia saja cuntenta ch'il cas saja terminà, uschia il pledader da l'interpresa.